



**Komunikadu Imprensa**  
**19 Abril 2023**

**JSMP kontribui ba revizaun Regra Tara-Bandu iha Suku Samalete antes realiza seremonia re-tara-bandu**

Iha 13 Abril 2023, autoridade lokál Suku Samalete hamutuk ho comunidade sira re-tara-bandu iha sira nia suku ho prioridade tau bandu ba estraga ai-horis, animal no mós bandu ba viola ema nia direitu. Iha prosesu revizaun ba regra tara-bandu ne'e hetan apoiu husi Organizasaun Naun Governental, Programa Monitorizasaun ba Sistema Justisa (JSMP) hodi asegura regra sira tara-bandu nian bele iha armonizasaun ho lei nasional sira.

“ JSMP haksolok tebes bele tulun autoridade lokál no mós comunidade suku Samalete iha prosesu ida ne'e, halo revizaun ba sira nia regra tara-bandu tanba ida ne'e tama mós iha objetivu serbisu hamutuk ne'ebé realiza ona entre comunidade suku Samalete ho JSMP kona-ba apoiu ba justisa komunitáriu atu comunidade sira bele iha regra ne'ebé iha nia implementasaun la kontradiz ho lei nasional sira,” dehan Sra. Ana Paula Marçal, Diretora Ezekutiva JSMP.

Xefe Suku Samalete, Sr. Antonio Soares hateten katak seremonia re-tara-bandu ne'e realiza ho objetivu atu kontribui diak liután Governu nia programa kona-ba proteze ambiente no promove arte no kultura iha sosiedade sira. Liután xefe suku hateten katak Suku Samalete rasik iha ona regra tara-bandu desde 2018 no iha nia implementasaun hatudu duni katak comunidade sira konsege proteze ai-horis lubuk ida no mós asegura tranquilidad iha sira nia suku.

Xefe Suku mós kontente tebes ho JSMP nia apoiu ba iha revizaun regra tara-bandu refere.

“Ba tinan ne'e ami kontente tebes iha ami nia regra tara-bandu tanba ami hetan apoiu husi JSMP hanesan ami nia parseiru foun ne'ebé kontribui hodi haree ami nia regra tara-bandu atu nune'e regra ne'e labele kontráriu ho lei nasional sira. Ami espera katak ba futuru ami nia implementasaun ba regra tara-bandu ne'e bele inklui ema hotu nia interese,” dehan Xefi Suku Samalete.

Parte seluk, Superintendente Asistente, Sr. Inacio Amaral nu'udar Segundu Komandante PNTL Munisípiu Ermera, iha nia intervensaun kontente tebes ho

Rua Beco Lakateu, Aldeia Manufuik, Suku Kolmera,  
Sub-distritu Vera Cruz Munisípiu Dili

PoBox: 275

Telefone: 3323883 | 77040735

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

prezensa JSMP liuhusi nia programa iha suku Samalete, fó mós parabens ba autoridade Suku Samalete ho comunidade tomak ba iniciativa re-ativa regra tara-bandu inklui husu ba JSMP atu kontinua haluan tan programa ne'e ba suku seluk hodi hasae koñesimentu autoridade lokál sira nian.

“Hau mós haksolok tanba ONG JSMP bele iha iniciativa halo serbisu hamutuk ho autoridade lokál sira hodi bele asegura regra ne'ebé bele han malu ho lei sira, tanba situasaun ne'ebé mak ami preokupa durante ne'e no rona katak regra tara-bandu kontráriu ho lei liuliu kona-ba nia sansaun sira no mós bandu hahalok balun ne'ebé la kriminaliza iha lei formál. Parabens mós ba autoridade Suku Samalete ho comunidade tomak ba hodi kontinua iha iniciativa re-ativa regra tara-bandu ne'ebé utiliza ona durante ne'e hodi proteze ai-horis, animal no mós asegura comunidade sira bele moris iha respeita malu nia laran Nune'e mós, husu ba JSMP atu se bele haluan mós serbisu hamutuk ida ne'e ho suku sira seluk hodi bele akompañia no hasa'e tan autoridade lokál sira nia koñesimentu hodi bele asegura labele mosu fali violasaun ba comunidade sira nia direitu iha implementasaun regra sira ne'e,” dehan Superintendente Asistente, Sr. Inacio Amaral Ermera.

Parte seluk Sr. Tomas da Costa Soares nu'udár Administradór Postu Administrativu Railaco, Munisípiu Ermera, iha nia intervensaun husu ba autoridade lokál sira atu aproveita didi'ak oportunidade serbisu hamutuk ho JSMP hodi bele hasa'e sira nia koñesimentu kona-ba prosesu justisa formál sira hodi nune'e iha implementasaun ba regra tara-bandu labele mosu violasaun ruma ba sidadaun sira nia direitu.

Entretantu Exelénsia Sr. Deometrio Amaral nu'udar Sekretariu Estadu Meiu Ambiente apresia tebes ho estrutura suku no mós comunidade Suku Samalete nia konsiderasaun hodi kontinua hamoris sira nia regra tara-bandu hanesan regra ida hodi proteze sira nia ambiente no mós regula sira nia moris iha comunidade nia laran.

Nune'e mós, Exelénsia Sr. Teofilio Caldas nu'udar Sekretariu Estadu asuntu Arte no Kultura hateten katak nia parte konsidera iniciativa ne'e hanesan pasu pozitivu hodi proteze no haburas regra sira ne'ebé mai husi lisan Timor nian ne'ebé la kontráriu ho lei nasional sira. Alende ne'e, kontente ho programa JSMP nian iha suku Samalete.

“Tara-bandu ne'e regra ne'ebé didi'ak duni tanba mai husi ita nia lisan ne'ebé eziste nanis ona mezmu nune'e presiza haree didi'ak tanba iha lisan balun kontráriu uituan ho ita nia lei nasional sira no mós sansaun sira ne'ebé dala ruma maka'as liu tiha fali ema nia kapasidade. Tanba ne'e, kontente JSMP bele serbisu ona ho estrutura suku sira hodi haree didi'ak regra sira no sebele ajuda hasa'e mós autoridade no comunidade sira nia koñesimentu hodi sira bele hatene didi'ak kona-ba regra sira ne'e no ne'ebé mak la didi'ak labele uza ona,” dehan Exelénsia Sr. Teofilio Caldas nu'udar Sekretariu Estadu asuntu Arte no Kultura.

Iha seremonia re-tara-bandu ne'e alende partisipa husi representante Governu ne'ebé fó mós sira nia liafuan badak, partisipa mós husi Asistente Inspetór Sr. Sudensio de Jesus, Komandante Eskuadra Postu Administrativu Railako, Sr. João Mestre,

representante Presidente Autoridade Munisípiu Ermera, Sr. Tomas da Costa Soares nu'udár Administradór Postu Administrativu Railaku, Munisípiu Ermera, komitiva JSMP, estrutura Suku Aamalete, lia nain uma lisan, no mós comunidade sira.

Programa Apoiou Seguransa Komunitariu (PASK) nu'udar serbisu hamutuk entre JSMP ho The Asia Foundation (TAF) ne'ebé finansia husi Embaixada Nova Zelandia hodi halo peskiza kona-ba oinsá efeitu husi justisa komunitáriu ba rezolve disputa sira iha comunidade.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: [ana@jsmp.tl](mailto:ana@jsmp.tl)

[info@jsmp.tl](mailto:info@jsmp.tl)

Website: <http://jsmp.tl>